

O'zbekiston Respublikasi Yoshlar ishlari agentligi,
Xalq ta'limi vazirligi, Innovatsion rivojlanish vazirligi,
Oliy va o'rta maxsus ta'lim vazirligi, O'zbekistondagi
Islom sivilizatsiyasi markazi, Fanlar akademiyasining
2021-yil " 13 " dekabr dagi
01-07/39, 68q/q, 14-q/q, 77-q/q, 156-q, 15/2-son
qaroriga 2-ILOVA

“Uchinchi Renessans – yoshlar nigohida” tanlovini o'tkazish to'g'risida NIZOM

1. Umumiy qoidalar

1. Tanlov O'zbekiston Respublikasi Prezidentining 2021-yil 26-martdagi “Ma'naviy-ma'rifiy ishlar tizimini tubdan takomillashtirish chora-tadbirlari to'g'risida” PQ-5040-son hamda 2021-yil 16-iyuldagi “O'zbekiston Respublikasi Vazirlar Mahkamasi huzuridagi O'zbekistondagi islom sivilizatsiyasi markazi faoliyatini yanada takomillashtirishga doir qo'shimcha chora-tadbirlar to'g'risida” PQ-5186-son qarorlarida belgilangan vazifalar ijrosini ta'minlash maqsadida oliy ta'lim va ilmiy tadqiqot muassasalarida ilmiy-izlanish olib borayotgan yosh manbahunos olimlar, tadqiqotchi va magistrnlarni qo'llab-quvvatlash hamda ularning ilmiy izlanishlari, tadqiqot natijalarini amaliyotga tatbiq etishga qaratilgan.

2. Ushbu Nizom “Uchinchi Renessans – yoshlar nigohida” tanlovini (keyingi o'rinlarda – Tanlov deb yuritiladi) o'tkazishning tartiblari va muddatlari, undagi nominatsiyalar, g'oliblarni aniqlash mezonlarini belgilaydi.

3. Tanlov tashkilotchilari Yoshlar ishlari agentligi, Xalq ta'limi vazirligi, Innovatsion rivojlanish vazirligi, Oliy va o'rta maxsus ta'lim vazirligi, O'zbekistondagi islom sivilizatsiyasi markazi hamda Fanlar akademiyasi hisoblanadi.

4. Tanlov g'oliblari va sovrindorlarini aniqlashda xolislik, odillik, shaffoflikni ta'minlash hamda vujudga kelishi mumkin bo'lgan nizolarni hal etish uchun Respublika tashkiliy qo'mitasi (keyingi o'rinlarda – Tashkiliy qo'mita) tomonidan Hakamlar hay'ati tashkil etiladi. Hakamlar hay'ati tarkibiga ko'zga ko'ringan olimlar, pedagog va amaliyotchilar, OAV va fuqarolik jamiyati institutlari, shuningdek Tanlov tashkilotchilarining vakillari kiradi.

5. Tanlovda belgilangan mezonlar asosida O'zbekiston Respublikasidagi oliy ta'lim va ilmiy tadqiqot muassasalarida ilmiy-izlanish olib borayotgan yosh manbahunos olimlar, tadqiqotchi va magistrlar ishtirok etishlari mumkin.

6. Tanlov quyidagi yo'nalishlarda o'tkaziladi:

besh muhim tashabbusni keng joriy etish va unga yoshlar qamrovini oshirish;

yoshlar o'rtasida IT texnologiyalar va xorijiy tillarni o'zlashtirishning zamonaviy mexanizmlarini ishlab chiqish;

ta'limning barcha bosqichlarida yoshlarning sifatli ta'lim olishini ta'minlash, hududlarda inklyuziv ta'limni rivojlantirish bo'yicha innovatsion yondashuv usullari (xorijiy tajriba asosida);

yoshlarni ilm-fan va innovatsiyalarga qiziqtirishning noan'anaviy usullari;

yoshlar, jumladan voyaga yetmaganlar o'rtasida jinoyatchilik va huquqbuzarliklar profilaktikasini amalga oshirish bo'yicha ta'sirchan mexanizmlarni ishlab chiqish.

2. Tanlovning asosiy maqsad va vazifalari

7. O'zbekiston Respublikasi Prezidenti Sh.Mirziyoyevning O'zbekistonda yangi bir uyg'onish – Uchinchi Renessans davriga oid fikrlarining mazmun-mohiyatini keng o'rganish hamda targ'ib etish orqali yoshlarni jamiyatda olib borilayotgan ijtimoiy-siyosiy jarayonlardagi faolligi, intellektual salohiyatini rivojlantirish, ilmiy tadqiqot ishlarini faollashtirish, ularning mafkuraviy immunitetini mustahkamlashdan iborat.

8. Tanlovning vazifalari:

besh muhim tashabbusni keng joriy etish va unga yoshlar qamrovini oshirish;
yoshlar o'rtasida IT texnologiyalar va xorijiy tillarni o'zlashtirishning zamonaviy mexanizmlarini joriy etish;

yoshlar, jumladan voyaga yetmaganlar o'rtasida jinoyatchilik va huquqbuzarlikning oldini olish va ularga qarshi kurashishning samarali mexanizmlarini ishlab chiqish;

ta'limning barcha bosqichlarida yoshlarning sifatli ta'lim olishini ta'minlash, hududlarda inklyuziv ta'limni rivojlantirish;

oliy ta'lim va ilmiy tadqiqot muassasalarida sifatli bilim olishini tashkil etishda yosh olimlar, tadqiqotchi va magistrning shaxsiy manfaatdorligini (motivatsiyasini) oshirish;

yoshlarda yurtimizda amalga oshirilayotgan islohotlardan xabardorlik va daxldorlik hissiyatini oshirish;

yoshlarni ilm-fan va innovatsiyalarga qiziqtirishning noan'anaviy usullarini yaratish va ularni amaliyotga tatbiq etish.

3. Nominatsiyalar bo'yicha tanlovga taqdim etiladigan ishlarga qo'yiladigan talablar

9. Tanlovda ishtirok etish uchun har bir nominatsiya bo'yicha quyidagi mazmundagi taqdimotlar taqdim etilishi mumkin:

besh muhim tashabbusni keng joriy etishning ilg'or texnologiyalari nominatsiyasi:

yoshlarning musiqa, rassomlik, adabiyot, teatr va san'atning boshqa turlariga qiziqishlarini oshirishga, iste'dodini yuzaga chiqarish bo'yicha ilg'or g'oyalarning ilgari surilgani;

yoshlarni jismoniy chiniqtirish, ularning sport sohasida qobiliyatini namoyon qilishlari uchun zarur sharoitlar yaratish mexanizmlarining mavjudligi;

yoshlar ma'naviyatini yuksaltirish, ular o'rtasida kitobxonlikni keng targ'ib qilish bo'yicha tizimli ishlarni tashkil etishga yo'naltirilgani;

xotin-qizlarni ish bilan ta'minlashga qaratilgani;

yoshlar o'rtasida IT texnologiyalarini rivojlantirishning zamonaviy usullari nominatsiyasi:

yoshlar o'rtasida kompyuter texnologiyalari va internetdan samarali foydalanishni tashkil etishga qaratilgani;

loyihani amalga oshirish texnologiyasining mavjudligi va uning ommabopligi;

xorijiy tillarni o'zlashtirishning zamonaviy usullari nominatsiyasi:

loyihada xorijiy tillarni o'zlashtirishda respublikaning olis hududlaridagi yoshlarni qamrab olish nazarda tutilgani;

xorijiy tillarni o'zlashtirishda yangi texnologiyalar va elektron dasturlarning mavjudligi;

yoshlar o'rtasida jinoyatchilik va huquqbuzarliklar profilaktikasini amalga oshirishning ta'sirchan mexanizmlari nominatsiyasi:

yoshlar o'rtasida jinoyatchilik va huquqbuzarliklar profilaktikasini amalga oshirishda ajdodlarimiz, xususan, Birinchi va Ikkinchi Renessans, jadidchilik davrida yashab ijod qilgan allomalarimizdan qolgan ilmiy-ijodiy meros asosida samarali va innovatsion usullarning mavjudligi;

yoshlar o'rtasida jinoyatchilik va huquqbuzarliklar profilaktikasini amalga oshirish bo'yicha ta'sirchan mexanizmlar (yoki loyihasi)ning mavjudligi;

jinoyatchilik va huquqbuzarliklar profilaktikasini amalga oshirishda internet butunjahon axborot tarmog'i imkoniyatlaridan keng foydalanish, sodir etilgan huquqbuzarliklar va ularni bartaraf etish jarayoni bo'yicha amaliy tadbirlar (taklif) berish.

yoshlarning sifatli ta'lim olishini ta'minlash, inklyuziv ta'limni rivojlantirishda innovatsion yechimlar nominatsiyasi:

O'zbekistonda ta'lim sifatini oshirishga to'siq bo'layotgan muammolarni keltirish va ularning yechimlari bo'yicha asosli takliflar berish;

ta'limda sifatli bilim olishni tashkil etishda o'quvchi-talabalarning shaxsiy motivatsiyasini oshirish, shuningdek, o'quv jarayoni va metodikasini o'zgartirish bo'yicha takliflar (asosnomasi bilan) ishlab chiqish;

mamlakatda ta'lim sifatini yanada oshirish bo'yicha zamon talablariga mos bo'lgan milliy model taklifini berish;

ta'lim muassasalarida inklyuziv ta'limni rivojlantirishda mavjud muammolar va ularni bartaraf etish bo'yicha asosli takliflar;

inklyuziv ta'limni rivojlantirish bo'yicha innovatsion yondashuv usullari va yechimlari;

O'zbekistonda ta'lim sifatini jahon standartlari darajasida takomillashtirishning natijador yo'lini taklif qilish.

yoshlarni ilm-fan va innovatsiyalarga qiziqtirishning noan'anaviy usullari nominatsiyasi:

yoshlar orasida ilm-fan va innovatsiyalarni targ'ib qilish yuzasidan noan'anaviy usullari;

bugungi kun innovatsiyasida buyuk ajdodlarimizning qo'shgan hissasining izini topish va aniq misollarda yoritish;

yoshlarning ilm-fan va innovatsiyalar sohasidagi yutuqlarini o'rganish, ularni hozirgi kunda qo'llanishi bo'yicha aniq mexanizmlar ishlab chiqish.

10. Belgilangan har bir nominatsiya bo'yicha tanlovning dastlabki bosqichida ishtirokchilar o'z loyihalarini taqdim etadi. Tanlov ishtirokchilarining taqdim etgan loyihalari Hakamlar hay'ati tomonidan ushbu nizomning 1-ilovasidagi baholash mezonlar asosida 100 ballik tizimda baholanadi.

Tanlovning yakuniy respublika bosqichi ishtirokchilari Hakamlar hay'atining loyihaga doir savollariga javob berishlari lozim bo'ladi. Hakamlar hay'atining har bir yo'nalish bo'yicha xulosasiga ko'ra, eng yuqori ball to'plagan 3 ta loyiha orasidan Hakamlar hay'ati a'zolari tomonidan ovoz berish orqali aniqlanadi.

4. Tanlovni tashkil etish va o'tkazish tartibi

11. Tanlov ikki bosqichda bo'lib o'tadi:

Boshlang'ich (birinchi) bosqich – oliy ta'lim va ilmiy tadqiqot muassasasida o'tkaziladi;

Respublika (yakuniy) bosqichi – Yoshlar ishlari agentligida o'tkaziladi.

12. Birinchi bosqich g'oliblarini aniqlashda xolislik, odillik, shaffoflikni ta'minlash hamda vujudga kelishi mumkin bo'lgan nizolarni hal etish uchun oliy ta'lim va ilmiy tadqiqot muassasalarida mazkur nizomning 4-bandiga muvofiq Hakamlar hay'ati tashkil etiladi. Ushbu bosqichda qaysi nominatsiya bo'yicha taklif kelib tushsa, faqat shu nominatsiya bo'yicha tanlov o'tkazilishi mumkin.

13. Hakamlar hay'ati tomonidan birinchi bosqichdagi har bir nominatsiya bo'yicha eng yaxshi deb topilgan bittadan hujjat (taqdimot) keyingi bosqichga tavsiya etiladi.

14. Hakamlar hay'atining tavsiyasiga ko'ra, oliy ta'lim va ilmiy tadqiqot muassasasi tomonidan 1-o'rin g'olibi va unga tegishli hujjatlar tegishliligi bo'yicha yuqori turuvchi vazirlik yoki idoraga yuboriladi (oliy ta'lim muassasalari tomonidan hujjatlar Oliy va o'rta maxsus ta'lim vazirligiga yuboriladi).

15. Mas'ul vazirlik va idoralar tomonidan kelib tushgan g'olib va unga tegishli hujjatlar (har bir nominatsiya bo'yicha) umumlashtirilib, Yoshlar ishlari agentligiga taqdim etiladi.

16. Tanlovning yakuniy bosqichi Tashkiliy qo'mita tomonidan tuzilgan Hakamlar hay'ati tomonidan o'tkaziladi.

17. Tashkiliy qo'mita yakuniy bosqich uchun tanlovga kelib tushgan loyihalarni Hakamlar hay'atiga taqdim etadi. Hakamlar hay'ati tomonidan har bir nominatsiya bo'yicha mas'ul vazirlik va idoralardan kelib tushgan loyihalarni saralash va ularning taqdimoti orqali har bir yo'nalish bo'yicha yuqori baholangan 3 tadan loyiha ko'rib, saralanib olinadi. Hakamlar hay'ati a'zolari tomonidan ovoz berish yo'li bilan 1, 2, 3-o'rinlar aniqlanadi.

18. Tashkiliy qo'mita quyidagi chora-tadbirlarni amalga oshiradi:

tanlovni tashkil etish va o'tkazish bo'yicha chora-tadbirlarni belgilaydi va amalga oshiradi;

tanlovni yuqori saviyada o'tkazish uchun tashkiliy qo'mita a'zolariga vazifalarni taqsimlaydi;

tanlovning yuqori saviyada va adolatli, shaffof o'tkazilishini ta'minlaydi;

tanlovni Nizomga muvofiq o'tkazilishini nazorat qiladi;

tadqiqot natijalari, maqola, videorolik, loyihalarni saralashda ushbu Nizomda belgilangan qoidalarga rioya qilmaslik holatlari aniqlansa, uni bartaraf etish yuzasidan chora-tadbirlar belgilaydi;

g'oliblarni aniqlash va ularni taqdirlash bilan bog'liq chora-tadbirlarni belgilaydi hamda amalga oshirilishini ta'minlaydi;

tanlovning ekspert guruhi va Hakamlar hay'ati tarkibini shakillantiradi hamda ularning rahbarini belgilaydi.

19. Tanlov yilda bir marotaba ushbu nizomning 2-ilovasidagi rejaga muvofiq o'tkaziladi.

5. Tanlovda ishtirok etadigan loyihalar taqdimotiga qo'yiladigan talablar va ularni baholash

20. Tanlovda yakka yoki jamoa bo'lib, 35 yoshgacha bo'lgan yoshlar ishtirok etishi mumkin.

21. Tanlov ishtirokchisi bo'lgan har bir shaxs yoki jamoa bitta nominatsiya bo'yicha bitta loyiha bilan ishtirok etadi.

22. Tanlovga taqdim etilayotgan loyihaga qo'yiladigan talablar quyidagilardan iborat:

yo'nalish bo'yicha ko'rsatilgan talabga yechim bo'la olishi hamda amalga oshirish mexanizmi aniq ko'rsatilganligi;

mavzuning mazmun-mohiyati to'liq ochib berilganligi;

muammoning yechimga qaratilganligi;

hayotga tatbiq etish, an'anaviy va innovatsion yondashuv darajasi mavjudligi;

mavzu yuzasidan takliflar, usullar va amalga oshirish mexanizmlari.

23. Har bir nominatsiyadagi loyiha yuz ballik mezon bo'yicha baholanadi.

6. Tanlov g'oliblarini taqdirlash

24. Tanlovning birinchi bosqichi g'olibi va sovrindorlari oliy ta'lim va ilmiy tadqiqot muassasalari tomonidan quyidagicha:

1-o'rin – 10 mln. so'm;

2-o'rin – 7 mln. so'm;

3-o'rin – 4 mln. so'm miqdoridagi pul mablag'i va tegishli diplom bilan taqdirlanishi mumkin va faqat 1-o'rin sohibi keyingi bosqichga yo'llanmani qo'lga kiritadi. Shuningdek, 2 va 3-o'rin sovrindorlarining ilmiy rahbari hamda tegishli kafedra jamoasiga rektor (direktor)ning Tashakkurnomasi beriladi.

25. Tanlovning respublika (yakuniy) bosqichida g'olib bo'lgan ishtirokchilarni rag'batlantirish Yoshlar ishlari agentligining byudjet mablag'lari hisobidan moliyalashtiriladi.

26. Tanlov g'olibi va sovrindorlari Yoshlar ishlari agentligi tomonidan quyidagicha:

1-o'rin – 30 mln. so'm;

2-o'rin – 20 mln. so'm;

3-o'rin – 10 mln. so'm miqdoridagi pul mablag'i, tegishli diplomlar hamda statuetkalar bilan mukofotlanadi.

27. G'olib va sovrindorlarni taqdirlashni tashkil etish maqsadida Tashkiliy qo'mitaning majlisi o'tkaziladi hamda tanlovning natijalari e'lon qilinadi. Tanlov g'oliblari va sovrindorlarining ro'yxati Tashkiliy qo'mita tomonidan tasdiqlanadi.

28. Hakamlar hay'ati tanlovning barcha nominatsiyalari bo'yicha natijalarini umumlashtiradi, har bir ishtirokchi tomonidan to'plangan ballar sonini ko'rsatgan holda nominatsiyalar bo'yicha bayonnomalarni tasdiqlaydi.

29. Tanlovda loyihalar talabga muvofiq kelmasa, Hakamlar hay'atining qarori bilan nominatsiya g'oliblari aniqlanmasligi mumkin.

30. Tanlov ishtirokchilari tomonidan taqdim etilgan ishlar qaytarib berilmaydi va bu bo'yicha e'tirozlar ko'rib chiqilmaydi.

31. Tanlovning respublika yakuniy bosqichini tashkil etish bilan bog'liq ishlarning moliyaviy manbalari:

Yoshlar ishlari agentligining budjet va budjetdan tashqari mablag'lari;

Yoshlar akademiyasining Iqtidorli yoshlarni qo'llab-quvvatlash jamg'armasi va qonunda ta'qiqlanmagan boshqa manbalar.

O'zbekistondagi islom sivilizatsiyasi markazi budjet va budjetdan tashqari mablag'lari;

homiylarning xayriya mablag'lari.

32. Davlat va nodavlat tashkilotlari tanlovda homiylik qilishlari mumkin.

33. Tanlovning axborot hamkorlari – O'zbekiston milliy teleradiokompaniyasi, O'zbekiston Milliy axborot agentligi.

7. Yakuniy qoidalar

34. Tanlovda qatnashish bilan bog'liq xarajatlar Tanlov ishtirokchisi tomonidan mustaqil ravishda qoplanadi.

35. Tanlovning ishchi tili: o'zbek tili.

36. Tanlovga kelib tushgan loyihalar qonun hujjatlarida belgilangan tartibda 6 oy muddat davomida saqlanadi.

37. Tanlovlar natijalari OAVda e'lon qilib boriladi.

38. Tanlov ishtirokchisi (boshqa shaxs) tomonidan tanlovning yakuniy bosqichini Tashkil etish va o'tkazish, shuningdek, uning natijasi bilan bog'liq murojaat(e'tiroz)lar qabul qilinmaydi.

“Uchinchi Renessans – yoshlar nigohida”
tanlovini o‘tkazish to‘g‘risida Nizomga
1-ilova

**“Uchinchi Renessans – yoshlar nigohida” respublika tanloviga kelib tushgan
hujjat(loyiha)larni baholash mezonlari**

| № | Baholash mezonlari | Ko‘rsatkichning umumiy reytingdagi salmog‘i | |
|-----------|--|--|----------------|
| 1. | Arizachining shaxsini tasdiqlovchi hujjatning nusxasi va talablarga muvofiq taqdim etilgan ma‘lumotnoma (ob‘ektivka) | 2 ball | |
| 2. | Loyihaning mazmuni | 23 ballgacha | |
| 1. | Loyihaning tanlov yo‘nalishiga mos tushishi, uning maqsadi va vazifalarining yoritilishi | 15 ballgacha | |
| 2. | Loyihani amaliyotga tatbiq etish darajasi | 8 ballgacha | |
| 3. | Loyiha taqdimoti | 30 ballgacha | |
| 1. | Loyiha taqdim etilgan muammoning yechimi bo‘lishi | Loyiha muammoning to‘liq yechimi bo‘la oladi | 12 ball |
| | | Loyiha muammoning qisman yechimi bo‘la oladi | 7 ball |
| | | Ko‘rsatilgan loyiha va taqdim etilgan muammo bir-biriga mos kelmaydi | 0 ball |
| 2. | Loyihaning originalligi, o‘ziga xosligi va talab etiladigan qo‘shimcha shart-sharoitlar | Loyiha original va o‘ziga xos bo‘lib nostandart usulda taqdim etilgan hamda amalga oshirish uchun qo‘shimcha shart-sharoit talab etilmaydi | 10 ball |
| | | Loyiha original va o‘ziga xos bo‘lib nostandart usulda taqdim etilib, uni amalga oshirish qo‘shimcha shart-sharoit talab etiladi | 7 ball |
| | | Loyiha original va o‘ziga xos bo‘lib nostandart usulda taqdim etilib, uni amalga oshirish uchun qo‘shimcha shart-sharoit asossiz talab etiladi | 4 ball |
| | | Loyiha raqobatbardosh va muammoga yechim bo‘la olmaydi, qo‘shimcha shart-sharoit asossiz talab etiladi | 0 ball |
| 3. | Taqdimotning tuzilishi (titul slayd, maqsadi, vazifalari, asosiy qism, xulosa) | Slaydlar o‘rnatilgan talablarga mos va ma‘lumot to‘liq aks ettirilgan | 8 ball |
| | | Slaydlar o‘rnatilgan talablarga mos emas va ma‘lumot to‘liq aks ettirilgan | 4 ball |
| | | Slaydlar o‘rnatilgan talablarga mos emas va ma‘lumot to‘liq aks ettirilmagan | 0 ball |
| 4. | Loyihaning xorijiy analoglarini mavjudligi | 10 ballgacha | |
| 1. | Taklif etilayotgan loyihaning xorijiy analoglarini mavjudligi | Taklif etilayotgan loyihaning xorijiy analoglari mavjud emas va o‘ziga xos | 10 |

| № | Baholash mezonlari | Ko'rsatkichning umumiy reytingdagi salmog'i | |
|-----------|--|--|----------------|
| | | Taklif etilayotgan loyihaning xorijiy analoglari bor, biroq farqli tomonlari yoritib berilgan | 7 |
| | | Taklif etilayotgan loyihaning xorijiy analoglari mavjud va uni deyarli takrorlaydi | 3 |
| 5. | Loyiha bo'yicha videorolik | 20 ballgacha | |
| 1. | Videorolikda loyihaning yoritib berilishi | Videorolikda loyiha to'liq, mantiqan ketma-ketlikda yoritib berilgan | 15 ball |
| | | Videorolikda loyiha to'liq yoritib berilgan, mantiqan ketma-ketlik mavjud emas | 10 ball |
| | | Videorolikda loyiha to'liq yoritib berilmagan | 5 ball |
| | | Loyiha bo'yicha videorolik taqdim etilmagan | 0 ball |
| 2. | Videorolikning talablarga javob berishi (1 daqiqadan oshmagan, .avi, .mp4 formatida) | Talablarga javob beradi | 5 ball |
| | | Talablarga qisman javob beradi | 3 ball |
| | | Talablarga javob bermaydi | 0 ball |
| 6. | Loyihaning istiqbolli rejasi | 15 ballgacha | |
| 1. | Taklif etilgan loyiha istiqbolli rejaga ega bo'lishi hamda ajratiladigan mablag'lar asosida amalga oshiriladigan ishlar (amalga oshirish mexanizmi asoslanganligi) | Loyihaning istiqbolli rejasi hamda ajratiladigan mablag'lar asosida amalga oshiriladigan ishlar to'liq yoritilgan | 15 |
| | | Loyihaning istiqbolli rejasi qoniqarli yoritilgan hamda ajratiladigan mablag'lar asosida amalga oshiriladigan ishlar to'liq yoritilgan | 10 |
| | | Loyihaning istiqbolli rejasi qoniqarsiz yoritilgan hamda ajratiladigan mablag'lar asosida amalga oshiriladigan ishlar yoritilmagan | 5 |
| | | Loyihaning istiqbolli rejasi yoritilmagan | 0 |
| | | Jami: | |